

懷清堂集卷十八

仁和湯右曾西厓

贈顧九恒時戊戌上元後四日

八十翁真壯青雲算鶴程賦詩畱古意把酒謝時名夜雨  
燈前話春風隴上耕魯連心侗儻高意動聊城

題萬九沙蘭窻卷

劍履槐堂世業存高風佩芷襲芳蓀窗前蘭似廳前柳指  
與丹陽六代孫

春叢空谷紫抽芽九畹風流異代誇三百年來收拾得大  
弓寶玉送君家

送馮文子之禮縣

行矣將圖不朽名未嫌仙令一官貧地連同谷曾開府天  
近陽關正用兵小邑自來無大費薄田只要勸深耕誰知  
萬里河湟外正有書生願請纓

與翁思敏話舊

與君同學又同年家世潘楊舊有連挾策蚤曾鄰馬肆脫  
裊誰省弄犀錢家山並宅心長在宦海聯舟地偶然虎嘯  
猿吟郎子國不妨閒話夜燈前

寄和令詒給諫

海上看鷗幾歲華舊來朋好每咨嗟九苞威鳳饑何食一

角神羊觸必邪焚草未應忘報國著書聊喜得名家當時  
湯餅筵前客玉雪兒郎已可誇

憶到天池彩翠重只今梧院尙陰濃一坳水底波濤濶千

尺枝邊雪霰封地下故人雙諫議

謂西齋  
耳谿

門前黛色九芙

蓉祇應爛熟塵中事未厭山僧夜打鐘

### 簡礪房

兩三坊隔無多路六十年餘有限人只合時時尋老伴還  
教處處鬪閒身詩場戰後千夫特酒海深來四序春我以  
右軍終樂死是非得喪等浮塵

### 送色侍郎奉使西寧督理兵餉

天近陽關震鼓鞳行營金印手親提轉輸關內兼河內節  
制隍西更隴西傳箭軍中收鐵勒踏歌池上唱銅鞮葡萄  
酒熟邊城路好問尙書訓士齊

時尙書富公  
開帥府肅州

### 過法華菴

玉河屈曲貫城流匯作風漪十頃幽清浪似翻龍鉢底閒  
雲遙接雁池頭老慚佛法三乘入病想僧房一榻休他日  
蒲蓮浩如海可知宜夏復宜秋

### 天河

用杜  
韻

素練經秋直涼波徹曉明界天分淡白避月出孤清隱見  
光浮地闌干影挂城待尋機上石好趁晚潮生

棗

初種甫尋尺今看半出簷實經風裏折味較市中甜鄰遠  
知難撲兒爭笑不廉甘瓜削榆次爲飢客盤兼

偶見

忽看田野趣半在老夫家屋角壺堪斷籬邊豆尙花侵階  
叢野菊絡石蔓秋瓜他日東屯去爲農興倍加

曉起

林鳥忽一鳴攬衣起已曙風吹夜來雨葉落窗中樹梁燕  
去仍還池花晨復暮似聞采菱曲夢入江南路

宣武門東城下曉行

老去應官有底忙未明先起攬衣裳人從鴉鵲聲中出路  
入輪蹄影裏長牖下已添秋水勢城陰初散曉煙光隔河  
樓上花枝好尙護重衾半篆香

中秋月蝕

明鏡塵昏險匣斑參差桂樹有無間夢覓似到清虛府偃  
息真慙救護班玉斧修來仍璧合蚌胎滿後看珠還一篇  
孤憤貞元體笑爾妖墓亦等閒

戊戌閏八月三日送安溪相公喪至廣渠門外歸過

萬柳堂

碧柳行疎尙有塘偶隨步屨一褰裳三年人到悲歡異

乙未

秋餞送相公  
假歸曾過此

八月秋深葦荻荒橋壞誰裝新雁齒水枯已

斷舊魚梁過溪更問參寥子

向有龍井僧住此今  
叩之歸已二年矣

雲物蒼

然念故鄉

### 葛氏莊

入門池上小茅亭瑟瑟菰蒲水檻臨三尺也看波激濫數  
峯差喜石嶽崆天邊月到平臺迴春際花藏曲塢深不問  
園林誰是主可知看竹子猷心

### 小雪後八日宿聿修學士苑西新居

逆旅當時兩寓公

壬辰以來數與  
學士借宿於此

林亭今屬主人翁隔牆

幾見葡萄熟來歲還添芍藥紅袞袞流年飛鳥過紛紛俗

慮覆杯空閉門風雪蒼寒地此意期君晚節同

自苑西歸行墟墓間

東華西苑往來頻失笑車中七尺身老冉冉兮雙鬢雪冢  
纍纍處百年人青天月自無今古滄海珠休問假真何肉  
周妻皆有累不知何路出風塵

大雪後一日九恒礪房同集寓齋感成一篇

下坂千尋石礙輪掀天一葉浪無垠百年幾見爲歡夜列  
座誰非旣老人醉尉且休誇故李童兒聊任羨新秦溫房  
小墜堪遊戲已遣寒梅豫報春

西苑請 皇太后安是日大風寒甚



撲面風尖奈爾何日光未動曉寒多問安長信宮中去緩  
步宜春苑裏過石以霜侵稜刻削冰如山立勢嵯峨污人  
何與元規事十丈飛塵一任他

除夕前一日作

女中堯舜失宣仁 聖主居廬孝理新每待檢書官燭短  
苦難安枕禁鐘頻十行遺 詔冰霜日三獻哀詞侍從臣  
歲晚玉堂尋故事更無帖子寫宜春

覓春

覓春惆悵爲春遲九十風光欲半時桃盡乍苞宮纈影柳  
條未散麴塵絲年年觸物心多感夜夜懷人夢有思院落

燈紅簾月白且排閒悶一篇詩

元夜思敏南指聖湖雪子咸珍峙公聿修寓齋小飲  
寶馬香車五夜回銀花火樹九門開強酬節物因畱客未  
減風情試撥醅皓魄最明今夕月繁枝猶放故園梅

盆梅  
數本

皆故鄉  
所寄

只嫌寂寞歡悰少喚取笙歌一部來

### 次韻奉贈雪子

昔游曾是十年遲洛水梁園並馬時笑我尙羈轅下足美  
君未點鬢邊絲因懷薦士中多愧除卻歸田百不思蚤晚  
高才選何武中和樂職賦新詩

清明前一日與蘭揮舜揚南指翰編奏功比部西亭

水部蒼孚思敏農部聿修大令峙公雪子文學花

下小飲

初過百六煩春工千枝萬枝雲錦叢杏花未愁梅已老照  
眼瞥見山桃紅是誰啣出蓬萊宮吾家亭子東復東三更  
霑洒微雨潤百態婉媚朝陽烘臙脂點注珠粉融玉兒窈  
窕窺房櫺一堆香雪嬌矮嬌三年三度清明風有力莫因  
陳子公得閒卽覓王無功山雲本是戀邱壑野鶴乍似辭  
樊籠樂哉累觴一舉空冰綃卷出霏霧濛尋香已見接翅  
蝶簇蘂漸鬧黏鬚蜂武陵漁郎逃短篷天台仙路杳不通  
極知此日足可惜默數後會將毋同當時少年今老翁花

開花落常忿忿夜闌更借官奴笛一曲清歌明月中

酬蒼孚農部

倚遍曲闌風年光逝水同春當三月尾人在百花中數數

煩佳句時時借樂童

農部每以歌者至

鷓鴣遙夜唱聊復慰衰翁

齋中山桃盛開雪子用東坡江行見桃花韻作一篇

見貽次韻奉答

佳士如名花常恐委草莽心思折麻贈莫遣采蘭阻之子  
故鄉來冰雪暗江浦坐我林亭春紅點衣上雨似聞歌桃  
葉姪姹磨門女連朝困風霾欲刮一寸上幾枝吹未折萬  
朶嬌無語酌之以清詩逸思共霞舉湖堤晴淥漲夢想烟

際觴武陵疑可尋  
雞黍具客主天台採藥去  
誰云入道苦  
我作如是觀造物方付與  
與酣掌中盃  
意盡腰下組  
期君和露種天上鳳翔翥

新移蜀海棠二株

石鏡山頭好顏色  
蜀王宮中留不得  
化爲絕艷到天涯  
燕燕鶯鶯春一國  
嫣然顧我頎而姝  
雙鬟千萬買不如  
輕陰似護午睡態  
細雨爲洗梅天圖  
施粉施朱兩何有  
強言國色朝酣酒  
慈仁院中今幾年  
玉蘂飄零根已朽  
小窗揀得最鱗枝  
桃李開殘未後時  
風和晝永簾押靜  
看爾綽約神

仙姿

感懷四首

弱齡志典墳中歲踏朝市生逢堯舜君可以出而仕十年  
持史筆八載分諫紙迴翔領清班荏苒逮暮齒雖無理人  
術頗抱竊祿耻進退觸藩羝耿介罹羅雉漳濱久寢瘵老  
氏貴知止傾危聲利場翻覆輕薄子昔爲膠與漆今化虎  
與兕問君何以然趨勢古如此但邀令尹顧請爲公子死  
冥坐息羣動曠懷思往賢塊然獨忘情乃在太古前自小  
爲骨肉豈能捐愛恩中路各翻飛四運多變遷葱蒨瓊樹  
枝演漾璇水源榮枯詎一致得喪感萬端矧余三紀餘摧  
剝傷肺肝芳華及時曜霜露淒復寒君看田中瓜鈎帶子

母連君看林中葛詰屈枝蔓纏在物猶如此于人良可歎  
仕宦三十年始獲有此居此居何所有所有千卷書高詞  
足文府精理握道樞一語苟爲妙萬言同翳如所以餐霞  
人騰身在空虛駕鴻乘紫鳳飄飄風霧俱左顧汾水陽右  
盼崑崙墟天孫錦七襄靈妃衣五銖下土方辛苦窮老注

蟲魚

歌亦不全無酒亦不全有逍遙有無間雲夢吞八九黃河  
只裳帶泰山等培塿功名足還倚富貴手被肘同爲可憐  
傷何者云不朽牛山忽揮涕歷載到峴首況我沈冥人大  
海粟何有直排金銀臺南北望箕斗

送陳五玉之廣陵

名何減驃騎子方在第五賈氏諸弟昆季也虎最怒文度  
置膝上當年記懷祖我每到君家輒共阿戎語流年飛電  
過頭顧各如許翩翩書記才彩筆懸幕府開懷淨冰雪不  
遣谿壑阻曾看橫海鯨東誇朝日吐三年陳畱郡爲愛風  
俗古南登滕王閣帝子弔江渚今茲廿四橋雷塘滿禾黍  
平山聊騁望千里入平楚過江六朝山一一澹可數茲游  
殊不惡況乃得賢主歲晚歸去來片帆買江滸臥聽吳孃  
歌一枝響柔橈到家螭瓮熟昵昵話兒女白鬚有賢兄夜  
聽對床雨閒繞西湖寺勝蹋東華土俗士難與言寂寂笑



鄧禹

題商邱畫蘭

竹箭美必採澤蘭香宜紉公子鎮東南空谷無幽人偶然  
記妙墨寫此平生親吁嗟魏公籌小筆乃爾神

已亥五月足疾杜門雪子峙公過訪閒話竟日作二  
篇奉贈各以姓立韻

五馬浮渡來最數江東王豈惟養炬輩烏衣冠諸郎吾子  
年少日五色成文章舅氏古先生館子白鳳堂當時兩冰  
玉戚姬分末光我時黔陽歸始接衣履香回頭二十載雙  
鬢漸已蒼鸞鳳刺天飛翦翎不得翔竭來到京國執手共

感傷子才必見收行待槐花黃世有蕭穎士當識古戰場  
何假吳武陵一賦袖阿房

我老多昏忘頗似東陽沈每呼讀雌霓愛子獨精審連年  
領書局捆載車接軫休沐無餘閒肝腎費鐫鏤誰爲左右  
手衰疾謝不敏子也實儁才墨盡有餘瀋寸截方圓玉百  
衲龍鸞錦平生江鮑體繁麗自天稟瑣瑣視羣兒不滿一  
笑哂雅耽水竹居時就文字飲娉婷惜不嫁況乃邢與尹  
我誦退之言枚臯窮且忍

樹下一首

日夕坐簷下愛此嘉樹陰嘉樹最何好斜陽在高林兩株

盡西靡一株還東臨葉葉似相蔭枝枝若相尋宵有熠熠  
螢晨有關關禽下及九仞泉不見螻螳侵上蟠百尺枝時  
聽竽籟音生非椅與桐材不中瑟琴又非杞與梓梁棟非  
所任只合幽人居同此靜者心念昔始尋尺合抱遂見今  
荏苒四十年老大轉沉吟閱人良已多對酒未忍斟中丞  
宰木拱大令宿草深獨有顛顛客猶然未抽簪

四十年前  
屋主人爲

傅雨臣中丞沈礪房大令嘗  
假館焉余每往來談讌於此

旬日癘毒發右足創甚至不能履地一篇解嘲

是身如芭蕉破碎霜雪裏衰年諸病入小者亦爾爾經旬  
困吟呻永日在牀第乍疑馬便疥肯信蛇齧指痒當十手

搔快得一餉美初焉爬鳥爪旣乃螫蠱尾顛倒覓夢驚楚  
毒支體毀寧知痛至骨但見水如泚到曉或不暝竟夕常  
數起嗔火熾未斷魔風颺不死斂剝無憐肌浸淫有抉髓  
誰云尊兩足會當滅一趾決命訪醫門捧方求藥市煖湯

濯宜數裂裳褻方始

裂裳褻足  
墨子事

茗勤點紅囊果還佐青子

近用龍井茶研  
末橄欖核燒灰

詎免水厄諄聊用瘍祝比支離近齊纂磨

括類燕砥敢云蹇無尤麤望跛能履鶴脰翹不下夔足隻  
還騎介驚公文軒半笑習鑿齒拘拘還造物跂跂逐蟲豸  
折或以占鼎歆恐同廢几踣躄亦復佳蹒跚未宜鄙久虛  
結客鞮屨缺候門屣猶能蹋冰無但可曳杖耳臨風畏蹉

跌看月艱尺咫扶行必徐徐舉步輒止止誰爭黃犢健自  
愛白駒駛智已不如葵憂同常寘杞易林據棘履杞跌刺爲憂何由輕  
綠骨空自繫金柅就燥呼芎藭去濕載薏苡榆枋雀一踊  
霄漢鵠屢企扶舉有門生閉戶非高士聞音久寂寞遺土  
或倫擬周遭解脫門出入無何里嗒然忘其身微疾何慍  
喜

奉和 御製賜太倉相公以下詩四首康熙五十八  
年六月

四始鈞陶第一人宮商入律協君臣高詞冠古篇篇妙至  
德根心字字真道貫百王言作範書窮萬卷筆如神揮毫

軒食宵衣後六十年來慎笑嘖

包羅歷代衆詩人沈謝何劉總隸臣  
句裏風雲森氣象行  
開煙月出清真黎元念切知無逸  
造化心通識至神遙想  
仙都凝望處夏山新霽翠如嘖

螭坳龍尾幾前人寶翰輝華寵老臣  
求舊每多今昔感  
謙亦本性情真詩成御製同三代  
福自天申護百神殿閣  
薰風晴晝永墨花遙共苑花嘖

樗散才非侍從人猥蒙異數領詞臣  
十行札賜劉常侍兩  
命恩隆賀季真立鵠班中瞻睟穆  
飛龍天上見精神南山  
願獻無疆壽四海歡聲笑不嘖

雨過

徂暑溽未闌，油雲暖將夕。林中過涼雨，墻外響幽屐。在襟  
冲思盈，卽事囂塵隔。氣迴枕簟冷，意愜魘夢適。起行到前  
除，抱疴稀履迹。池邊孤月上，露下幽花滴。牀頭一卷書，千  
載猶宿昔。不有盈樽酒，何以慰離索。

獨坐

老椿百尺枝，高槐一畝陰。不見喬木古，詎知幽居深。身閒  
疾漸遣，事往感在今。挾子烏朝飛，嘯侶猿夜吟。如何別親  
愛，惻惻恒此心。長廊去逶迤，行跡難重尋。惟餘松石閒，髣  
髴有遺音。幽憂何以寫，空此風中琴。

臥起遣懷

天風海濤喧一枕臥看高槐舞疎影起行雨過百草榮坐  
久窗虛九秋冷青綾白袷或時御葵扇絺衫俱可屏陰濃  
舍後有梧竹寂寞門前無造請偶然一病豐暇豫且爲多  
年掃頑礦時患癩毒米鹽家人事休白婚嫁兒曹書不省汎汎  
常思月在湖悠悠只憶雲生嶺歸與老境便平魚稻久矣  
童心戀閭井且試山中昨寄茶玉溝清泚佳光景

七月一日偶作

夜多不寐晝慵行強起風前白袷輕老去但餘松石意客  
來勸聽管絃聲綠萍得雨依依合紅葉先霜艷艷明

都中雁來



紅盛于六七月至八月後萎 物色新添四叢桂故人遠致闔閭城

立秋後漢瞻見過

取次金行熱未休 桐庭一葉落還不誰言積雨能消暑纔

到斜陽已入秋

是日以酉時立秋

舉扇似添風瑟瑟展衾試待夜

悠悠清樽可是招涼物更乞先生爲小畱

明日復用前韻作一篇

叢薄煙銷雨意休 西風策策簞知不每嗟世閱人成世

見列

子肯信秋非我有秋

見漢書

殘暑入林蟬嘒嘒蚤涼牽夢蝶

悠悠曲闌干外閒亭子多爲看花待月畱

重過法華菴

慈恩寺外碧湍流故老猶傳地最幽銀漢影斜天左界鏡  
光湖接水西頭煙雲日日從舒卷衰病年年未退休九十  
劫如風雨疾蟪蛄那復問春秋

夜雨

淅淅復淅淅終夜不斷絕恍聞秦絲怨如聽隴水咽孤臣  
十年流思婦萬里別如何此時情淚下俱成血

懷清堂集卷十九

仁和湯右曾西厓

詠齋中草木五十二首同雪子作

松

去年霜後枯今歲雨中蘇不是蒼髯叟誰當慰老夫

桂

分將月中種自我山中寺

天竺也

山中人<sub>二</sub>不歸月中香可致

槐

翠作老龍蟠陰濃六月寒清心了無夢不入大槐安

椿

童童覆如蓋南堂綠陰滿仙人八百年來共靈椿館

桐

清陰凋急雪無復蔭我室欲斲枯桐枝恐不中琴瑟

榆

我家老榆樹枝榦蛟龍纏題詩厭常語不道沈郎錢

竹

碧篠數十竿徒栽疎復密莫訝叢喧卑漸喜鞭橫逸

楸

布葉如雲屯蒼然入夏冷西風障落日晚下茅亭影

合歡

合歡夕常合葉葉自成行金堂七十二莫作野鴛鴦

丁香

嶺南雞舌香似非此丁子君看細黃花豈有白與紫

柳

寄生良已孤成陰或可舍春來一條條垂在西廊下

西府海棠

蔓草羅袞色芙蓉臉際紅文君有故里簾幕海棠風

杏

披草徑纖纖映籬門窄窄恍如鳴鳩時村邊幾枝白

梅

物以希爲貴，盆梅發寒沍，何必江南村。橫斜于萬樹。

茉莉

雙姝出南海，玉質臨風竝。都人簪奈花，不識那悉茗。

紫薇

移來紫薇花，本出紫薇省。誰與青瑣郎，綵筆照花影。

牡丹

種自曹州，寄名仍洛下。來東風相入，欺得芍藥出豐臺。

蘭

猗猗庭中蘭，國香比國士。不得貢玉堂，言念在君子。

玉蘭

辛夷開未開迎春好時節邈爾姑射人肌膚若冰雪

榴

榴花拆紅襟花落房多子時聞墮堦聲淋漓浪秋雨裏

山桃

山桃花盛時香霧晚羃羃客散月朧明三更遣吹笛

菊花

不資服餌用何取品目殊但念東籬花九日不可無

洋菊

八月有黃花坡公謂可怪詎知海外種觸暑園翁賣

荷

紅芳三十里采采意未厭今來花甚稀  
柄柄青荷葉

蓼

汀洲采自蘋道遠不得致對此紅一叢  
江湖渺幽思

翦秋羅

佳人理刀尺中夜起太息紅翦羅衣裳  
年年作秋色

鳳仙

娟好女兒花秋風乍入簾最宜紅透甲  
先上玉纖纖

秋海棠

花妥嬌無那莖承翠交委墜露小闌邊  
西風危石底

百合



根作白菡萏葉作青琅玕斑斑赤豹文倒垂花際看

郁李

常晚尚餘花條繁多依砌悵然獨懷人戚戚遠兄弟

夾竹桃

似桃還倚翠似竹更倚紅海外仙山物溫台落手中

夜落金錢

金錢夜夜落不抵一錢看借問張公子何如逐彈丸

萱

金質挺炎辰薰風日披拂祛癘苟未由萱蕝爾何物

藤

得時各惹舊託根迺參差穿籬復絡石不得挂高枝

葵

耀日如摛錦傾陽每上堦時來和露折佛日有清齋

秋葵

獨搖金盞側淡着鞠衣黃洗盡風流態宮人入道裝

芭蕉

簷端心不展窗下陰常寂莫待夜霜侵慣經秋雨滴

杜若

花疎風下上枝弱雨離披杜若芳洲畔名曾入楚辭

牽牛

碧花骨籬落秀色紛偃蹇歛時日欲烘開處露猶泫

玉簪

修纖白玉簪美人理雲髮散爲六出花遙映三秋月

雞冠

軒然岸雞幘聳聳長身直笑爾鶴頭丹焉能備五色

萍

盆池萍忽合綠水自生肥時復驚魚闖由來有絮飛

薜荔

移根甫徑尺枝蔓忽縷縷不記上墻生莓苔足秋雨

月季

惺清堂集 卷十九 五  
四季有葵花風前月下俱寫生南劍老添入錦堂圖

虞美人

今作原上花昔爲垓下土似聞楚帳歌猶作虞兮舞

刺藤

粲粲黃荼藤隨風每低昂似念攀折苦棘刺以自防

扶桑

憶昔日南花猩血染如一愛此扶桑紅一紅經百日

夜來香

白日車馬喧朱門酒肉臭所以暗香來多在夜涼後

雁來紅

掩冉曲籬旁深紅間淺黃殷勤語來雁慎莫帶微霜

忍冬

藤纏跨巖谷不與衆草伍保爾歲寒心忍茲霜雪苦

南天燭

八尺紅珊瑚如意一聲碎化作勻圓珠風雪小山背

蠟梅

香浮金蓓蕾色謝玉肌膚破蠟迎春日江梅先得無

左闕門外雨中

清池一道漾漪漣左闕門東太廟墀碧葉始生初夏節紅  
衣今落晚秋天采蓮歌斷佳人唱踏藕船餘稚子牽行到

迴塘聞雨滴西風衰髮正愁邊

中秋

是日聞

貴人之喪

金波澄處玉輪圓只少些些脆管弦涼冷影初沈皓魄鏗

鐃樂已罷鈞天陰晴帝里同鄉里哀樂衰年異壯年佳

節尚憑公等在醉吟直到燭花偏

時九沙南指兩翰編西亭水部峙公雪子兩文

學在座

送咸珎歸里

子病憐新愈吾衰送此行九年爲客意一月到家程旅雁  
秋來影寒潮夜落聲知添他日淚泉路渭陽情

薄聿修學士使還言山左李中丞酒間忽聞灤口商

人將醵金上壽卽於席上作教禁之方對客揮毫  
時歌者音律稍乖必爲駁正周公瑾之流其才不  
可及也作一篇爲寄

笙歌幾部沸華堂條教親裁燭兩行心念民疲如杜母耳

知曲誤是周郎千夫帳下麾幢繞七字毫端翰墨香

中丞號能

詩

聞道翁歸備文武再承天語在明光

上嘗嘉歎中丞爲文武全才者再

重九前一日文湘侍講艾堂宮贊蒼孚農部西亭水

部思敏侍御聿修大令元溪員外峙公雪子文學

枉過小飲

足盤妨閒步朋來慰索居庖厨未嫌薄文酒自相於雪片

分魚膾金膏溢蟹胥敢云同俊味聊當摘畦蔬  
細細雲初破悠悠月已中嘉辰明日是款語故情同可有  
登高約應憐避俗翁呼童種黃菊肯遣沒蒿蓬

客散後又成

客去仍無睡書拋復寡歡一燈聞雨滴半臂怯風寒青女  
行除架黃花漸入闌衰遲逢令節感歎此身單

重九

聞道傳杯不放杯重陽令節菊花開霜清佛閣人頻到水  
淨龍潭歲必來七年前每重九率于慈仁寺毘盧閣及黑龍潭登高老大登臨少筋  
力賓游觴詠嬾追陪絳囊佩得還隨俗好爲衰年更壓灾



丁巳春至旃檀寺忽忽四十二年迄今已亥冬偶重  
過此感思舊事如在夢中

鈿車香騎寺門前  
白晷當時好少年  
誰省王城春似海  
一枝壓得玉花偏

送翁聿修大令南歸兼寄尊甫蘿軒同年

酒香臘甕歲方徂  
去若登仙子甚都  
鳧舄春來仍入洛  
萼羹秋後每思吳  
四山迴合雲藏寺  
一葦空濛雪滿湖  
寄語蘿軒老居士  
不妨潑墨畫成圖

元日次盧舜徒光祿除夕見貽原韻

太官初識膳膏香  
三署兼司陞楯郎  
帝念清卿官特拜

人知勁節薦交章  
冠軍舊德曾燔契  
光祿新銜合築堂  
政事趙張誰可繼  
更誇文采似班揚

蒸壺約素自家風  
居損持盈道更冲  
心薄浮雲時態異  
義鍾老柏歲寒同  
韻無適俗思元亮  
力不因人笑子公  
正旦九衢車馬散  
冷烟濕雪寂寥中

燈夜與文湘西亭介夫峙公雪子小飲

餘寒猶自閉簾櫳  
手撥深爐熾炭紅  
門外襍褻三日雪  
竹邊掩冉一闌風  
歲時挑菜佳辰過  
燈火傳柑舊事空  
賸剪青蒿與黃韭  
天涯差喜故人同

海棠六絕句

窺簾無那醉嬌何北地臙脂寶曆多  
猶自穠華帶鄉井浣花賤色錦江波

不須施粉更施朱宋玉東家態不如  
乞與春陰好將護長紅小白半開初

兩株紅豔十分勻先後開時各鬪新  
底事春風不相見邢夫人對尹夫人

天姿富貴許誰同粉態珠光一片融  
任遣詩人笑麝俗小桃點注出繁紅

今年花發昨年枝光景流連又一時  
未必綵雲飛便去也應玉笛晚休吹

祝釐日日上經壇常恐花時倏已闌夜半明燈圍院落更  
畱好客勸勤看

明日又作一篇

爛熳春城看似無碧雞坊裏敵千株憑誰貯汝歸金谷可  
用移家就石湖曉日烘開紅蓓蕾晚風褪出雪肌膚未教  
綺語刪除盡禪榻茶煙笑老夫

花下

晚將淨眼覷無方偶逐天花卽道場判與色香新世界劃  
開鶯燕舊封疆濯枝雨喜連朝潤颺幕風驚昨夜狂石上  
落英紛不掃游蜂冶蝶漫奔忙

王帶河侍郎餉餅四十枚作歌

蒼龍昏見時正陽涼風如秋  
墜隴黃千村碌礪鎌鍛忙  
霏霏落磴天雨霜爛然瓊糜照筥筐  
佳人洗手朝入房雕盤  
細瀉銀餅湯女丁婦壬互劑量  
小團月出戶東廂春綿秋  
練方法良漬疑鶴髓貴莫償薄如蟬翼輕欲颺  
炊裂十字進高堂近賓密友懼未央  
老饕念我還分將磊落四十如  
截肪華山玉屑細有香梁甫銀泥白更光  
豈敢污汝羅酒漿清風茗椀聊試嘗  
重樓十二弛戟防委輸華蓋掩太倉  
終宮真人壽而康下有童子舞黃裳  
紫洲小姑莫漫狂白  
石漱琢無堅剛靈根顧視猶未亡  
溫淳此味詎敢忘誰其

遺者瑯琊王飽聞設食齊殊芳鄒平況自有憲章平生說  
經笑公羊軟美便思老是鄉口腹累公豈可常請從秘苑  
求其方

藤廳花時偶作

文書堆案眼從遮不記藤陰日又斜滿架丰茸綴纓絡兩  
株詰曲走龍蛇似聞西省新栽竹空憶東堂舊種花六七  
年來幾閒日風爐雪乳一甌茶

題李曲江侍郎戎裝出寨圖

先生知國等知兵擐甲龍沙萬里行  
冠子翼真宰相器輦車驪駕歷諸營

庚癸從無一士呼平安火直接神都英姿颯爽如褒鄂曾  
在凌烟貌得無

庚子五月初三日復過法華菴仍用前韻

驚嗟歲月去如流三度風潭景物幽古佛寶坊臨水尾相  
公樂府換歌頭

李文正公樂府最傳于世菴卽文正別業地也百年劫火燒應盡

十里肩輿倦且休點點綠錢南浦上雨來蕭颯便成秋

五月十四日夜露坐

高林晚露寂不喧短籬疎花幽自翻何當羽衣入舞砌豈  
有啄木來敲門穿池華月光下上拔地蒼石陰朝昏松風  
茗鼎橫一榻道人於此真忘言

雨亭制府郵示元夕駐師金沙口上詩作一篇奉寄

先生廊廟英器資備文武西南天萬里前席授玉斧百濮  
心綏懷諸蠻手摩撫陽關絕徼外一夕響鉦鼓犯我屬國  
疆 至尊赫斯怒親分賢王鉞特開元帥府日入崑崙西  
岑此河湟土沿邊列戰格滇也實門戶拜表卽出師師行  
若時雨軍無呼庚癸士每共甘苦刁斗厖不驚幕井民安  
堵慷慨取金印從容揮白羽儒者有此人如方叔召虎兵  
家貴閒道我聞諸前古纒蜀自陰平叩關由子午騎或一  
敵萬技料三當五鉤撞百道攻鼓角九地取書生好說劍  
文吏恥負弩雖借帷幄籌恐無尺寸補先生真國士才與



管蕭伍會須斬樓蘭未用招贊普金沙暮江口燈火繁星  
聚葡萄塞上杯勅勒軍中舞是時上元夜喜氣融諸部煌  
煌南極光煜燦眼親睹雪山界天末列障翠可數新詩競  
傳寫清風頌吉甫豈惟壯士歌行見樂人譜

曉霽

聽盡終宵雨開門朝日暉鬪生花有態獨下鳥忘機焙藥  
題新裹燒香理故衣蕭閒只如此已覺往年非

庚子立秋

炎毒何當休纖絺汗猶浹西風颯然至涼意欲動篋滋味  
覺鮮新衣裳初熨貼是時秋之孟四見莫生莢五行迭休

王勢若驟凌躡，尊收今始肅。龍火氣已懾，伊余抱煩痾。一體互莊蝶，憂虞理應遣。暇豫生可攝，憶昔槐弄黃。鄉選甫懷牒，蹉跎四十載。衰白遂滿鑷，懷新情依依。感舊歲劫劫，偶然設茶瓜。思與賓侶接，高林變蟬嘒。長廊響行屨，雅言賦新詩。逸興求醉帖，昨夕哉生明。一鈎掛壁頰，未嫌歡意減。已覺秋懷愜，中庭落梧桐。深巷賣楸葉，鄉心逐兒女。邽得渡江楫。

雨中喜晨再自潞河歸見訪

颯颯雨侵軒，沈沈樹隱門。棗垂烟外重，荷集晚來喧。潤始霑衣桁，涼宜近酒尊。欣逢故人至，一夕共清言。

送徐亮直編修奉使冊封琉球

龜鼉梁已駕東瀕寶冊光華寵命新  
受吏遠來滄海使宣風暫借玉堂人  
神魚跋浪迎旌纛仙草環洲集鳳麟  
一品錦衣歸獻壽此行最喜是娛親

憫忠寺後院

霽景高林外幽房曲逕過雙扉  
開晚照百尺見懸蘿葉葉含風細  
枝枝得雨多翠帷紛在眼彷彿到山阿

十月四日樸村晚過菊下小飲

又逢雲物晚秋澄去歲黃花今歲仍  
小墖踈檣香冉冉高枝密葉影層層  
那能畱眼看朝暮空自縈懷到寢興  
向夕

一弓明月下故人偶至爲燒燈

十月五日由德勝門往湯山接 駕

雲樹迎仙蹕人家近斗魁晚烟橫疊翠落日漲飛埃暫逐  
羣公出行穿萬馬回廿年思扈從無復舊鄒枚

清河野望

夢回兀兀復騰騰洗眼青山看幾層指點興亡飛鳥外西  
風衰草十三陵

仙女堡行

威弧幾時落旄頭松州雪嶺猶防秋仙女堡當轉粟道仰  
窺千仞俯九幽嵒嶽一綫險莫儔雨淋石滑行人愁馬蹄

忽蹶徐縣尹下與萬里長江流  
妻兒淚應猿聲落苦怨天  
高鬼神惡漢家票姚方少年  
蹋踰軍中正爲樂

湯山接駕

羣玉山頭雪未殘丹砂泉上不知寒  
載鳶已見前旌過捕  
虎遙從後乘看星亘五營天  
列仗龍騰八尺帝回鞍  
睿容有穆臣寮喜伏謁蠻旂第一竿

十月十日自湯山迎駕歸夜宿清河

閒雲一片本來輕野鶴孤飛不算程  
原上歸人斜日影枕  
中鳴轂曉鐘聲濁醪屢酌煩村叟  
嚴鼓稀聞近禁城三十  
四年流電速屬車塵後老書生

清河橋上

偃月形斯壯垂虹地本靈禹功通澮洫漢苑接郊坰風漾  
寒波白山銜落日青酒壚頻歲到衰髮感星星

送成綱齋出使安南

使星先入日南天朶殿新看 詔旨傳九譯蓋幢來白雉  
百重樓櫓望朱鳶林風箐雨山稠疊峒獠溪蠻路接連萬  
里何人諭威德此行端藉玉堂仙

題李文正公慈恩游詩卷後卽次原韻

有序

予同年白君彥京以茶陵李文正公慈恩游詩卷  
自陽城寓書寄余余視詩末題署正德九年甲戌

作爲公致政之二年而詩中流連景光沈吟老大  
詞旨悽婉文衡山爲之圖題曰西涯圖喬莊簡跋  
云寺之後曰西涯考公懷麓堂集有西涯雜咏十  
二首第四篇卽慈恩寺其他如楊柳灣鐘鼓樓四  
詩中亦互見則慈恩寺在西涯東西涯之名所由  
來久公因以自號今亦不復能識其處公詩首篇  
云幾人城市此曾游又云城中尙有山林在集中  
重經西涯有云城中風景夢中路又云禁城陰裏  
御河西慈恩寺偶成云城中第一佳山水則西涯  
之在城中無疑日下舊聞載淥水亭雜識云西涯

有李長沙別業考其地在今德勝門西予近年往來湯泉數得經過見風漪彌望直接德勝橋而東水物可愛有法華庵在其上意其爲當時之西涯所云積水潭海子亦卽此地但相去二百餘年不特琳宮佛屋灰劫無存而圖中所有喬木蒼巖長橋斷岸亦不復能彷彿矣莊簡又云西涯公嶽降地公詩有淚痕應共水俱流句又云撫今念舊爲之愴然集中如禪後述哀云應謝西涯舊時柳泣風愁雨共依依又重經西涯云淚滿密縫衣上線又云愛日慚非稚子歡又云慟哭兒童釣游地白



頭重到爲何人則莊簡所言信有徵矣至淶水亭  
雜識所云公有別業在北安門外或是生時所居  
非別業也集中有李白洲侍郎督復西涯舊業詩  
云三間矮屋一重樓則非莊墅可比其他若重經  
西涯云綠野無堂正憶裴又候馬北安門外游慈  
恩寺詩云十年一到竟何能又重經西涯云重來  
又隔幾寒暄又宿海子西涯舊隣云東陵舊路元  
相接若果別業尙存何至隔幾寒暄經十年不一  
到卽令止宿何用舊隣推此而言不但無別業並  
生時故居亦久廢矣錢蒙叟載公遺事罷相後設

客至不能具魚菜風捺如此豈能更爲平泉木石  
計集所云督復舊業者始終未之復也流覽感歎

次韻一章

池邊老鳳肯回頭

游在正德甲戌公已致政

樹裏驚鳥感昔游劉謝並

時同國論李何別派異詩流蒼茫野水圖猶在散落遺文

集未收

慈恩游詩五篇懷麓堂集不載

今日更憑誰指似三閒矮屋一重

樓

詩成意猶未盡又作四絕句

兒時游釣頻經處幾度垂楊信馬行玉果可曾分四座金  
環似省識前生

裴家宅裏秋天鶴房相池頭雪色鶯誰似幽居無一物門  
前贏得好烟波

成弘館閣數茶陵一代詩家無幾人可惜當時集賢院不  
曾寫得樂天真

弘長風流在鼎台一時門館盡英才諸生尙有東南秀未  
到平津閣裏來

文徵仲圖  
上署諸生

庚子十月二十八日盧光祿舜徒六十壽小詩一章  
以叙朋友契合之情非世俗頌禱語也

論交不在早但取意氣真君看青松枝何必桃李晨金石  
性不易芝蘭香宜紉我晚得益友頭上白髮新邂逅杯酒

閒情等骨肉親澄明抱霽月豁達排秋旻承家與報國恃  
此清白身子仕州郡日名已動縉紳酌泉新安江大好山  
水隣父老愛劉寵里閭思寇恂司刑來三吳泣獄明且仁  
滇海脂膏地俸不贍親賓歸來太常齋馘中欲生塵忌者  
不謂爾讒口信信信帝庭十二閑駁駱驪駟傾家營一  
豆不救武子貧 至尊洵亶聰拔擢驚無因名卿重清節  
豈曰算錢緡念子耿介姿在物無緇磷飄瓦擊不恨虛舟  
觸不嗔疾惡雖如風無心恩怨泯緇衣好賢什茲意常周  
葑三哺必佳士一飯無俗人退食插架書浩然渺涯津鏗  
鏘發宮徵筆落疑有神居貞心匪石守道節貫筠六十今

始滿堂上壽酒陳富貴取大槩功名畫麒麟二塗宜何從  
一笑無邊春

立春日忍病昇至書齋

縛箇籃輿茗椀隨南齋又到覓春時柳條未弄悠揚態桃  
蕊初含蓓蕾姿雪陣江天茅店酒梅花人日草堂詩病中  
只有思鄉夢官職聲名兩不知

院中齋宿

統如街鼓夜將闌樺燭烟銷夢向殘衰病久知曹事廢優  
容真荷 國恩寬太常曾視芬芳具

漢書五時無牢孰具  
芬芳不脩予辛卯爲

太常卿壬辰  
改翰林學士法駕頻叨侍從官 聖主爲民祈穀意屬天

燿火在郊壇

曉起

夢回特地紙窗明三日風篩雪未晴  
牕有烏鳶蹲凍樹了無燈火鬧春城  
詩人灞岸朝酣酒猛士關門夜斫營  
我老但餘癡鈍坐玉山空照眼崢嶸

懷清堂集卷十九

懷清堂集卷二十

仁和湯右曾西厓

送朱可亭總憲賑饑山西

憲府官彌重河東歲大荒地當千里赤麥失二年黃風俗  
多商估人家少蓋藏恐憑和糴議未足慰流亡

送盧舜徒光祿賑饑陝西

使者如甘雨隨車入雍州遺黎方望活 天子待分憂漕  
粟前籌急屯田後效收期君布嘉惠直到海西頭

去聲

酬蒼孚農部元夜見詒原韵

匆匆節物上元過肯念漳濱久抱疴着句暗中知沈謝苦

心灰裏撥陰何九衢燈火繁華盛六袞年光感慨多  
予開六袞  
猶憶當時舊風月得隣堂上夜徵歌  
今已六年矣

早春試筆

紅未抽芽綠已舍風光流轉我潛諳老無興味心常嬾地  
想優閒夢尙貪一片晴雲依闕下幾陂春水隔江南歸田  
每說人皆笑竊祿年多合自慚

湖心亭

自笑飄零劇可憐三年不到到欣然雲衣遙壓城一角天  
色欲紅山四邊

恭頌 萬年寶曆詩 有序



欽惟 皇帝陛下膺駿命恢丕基粵自卽阼迄於  
今茲聰明睿智神聖廣淵之德孚於上下覃於八  
表凡食毛含齒萌生蠕動之物莫不煦嫗至化漸  
濡大澤欣欣各遂其私繼昭夏軼三五皇哉暨乎  
莫得而京矣歲在辛丑 皇帝御極之六十年甲  
子一週顥穹示慶輿祉沓至垂萬世之基卜無疆  
之曆將復肇於今日循環之周而復始橐籥之鼓  
而日出景運昌數實苻其期於時諸王大臣庶司  
百職事暨轂下耆老太學生徒僉謂歷代未有伏  
闕叩顙請行慶賀典禮羣情喁喁呼籲懇迫

皇帝曰吁報本饗親之弗先其曷可已廼命禮

官諏辰庀物肆類上帝薦馨列祖親謁園

陵肅將祀事登劔盥洗罔或弗虔仁孝誠篤胥蠻

布濩大禮斯畢玉鑾容與歸自郊圻維億兆人

咸歡呼踴躍奔走摩霄漏泉氤氳鬱鬱之氣乃遂

畢達旣大和會萬萬一心復有山陬海隅黃髮鮐

背之老跋履遐遠越數千里雲集京師與羣公卿

士百姓伏謁端闈奉萬歲觴請上鴻號

皇帝撝謙至德有而不居親降德音飭政經卹人

瘼跼矜悚惕莫不欽歎時則瑞日騰曜卿雲流藹

士女童叟駕肩挂鞦喧闐抃舞於衢巷之內羽旂  
金節旛花贊唄鐘鼓絲竹鏗鏘之音延屬乎郊門  
之外太平之象旣洽仁壽之俗彌劭非甚 盛德

曷克臻此乎 臣考稽簡冊帝王之興多推本符命

於是鳳皇龍馬朱文綠字流星刻玉之異往往具  
載於篇其中哲后誼辟功德及人民欲得神望塞  
報以嘉應享國長久顧自漢唐以迄元明世系皆  
可考越數千百年如 皇帝至聖上德履飛龍在  
天之位備康寧壽考之福綿太極上元之曆古無  
有二靈貺殊造慶成錫羨延頸企踵者舌敝於謳

吟懷鉛握槩者詞窮於比擬臣竊推迹詩書所紀

如成周極盛之時周公名公卑公君陳之儔協心

同道底於至治所以願望其君者曰欲至於萬年

可謂至矣而必陳述於天之基命定命二雅所賡

善頌善禱天保之什首焉其詞非出於一人故曰

何福不除又曰罄無不宜又曰維日不足辭之重

言之複至於山阜岡陵月恒日升南山之壽松柏

之茂而必冠之曰天保定爾蓋言此皆天之厚有

德而致諸福也 皇帝受祿於 天嚴恭寅畏無

一時一事不奉若 天道照臨如日月奮迅如雷

霽濡潤如雨露孚信如四時 清明在躬與 天  
同體 天乃眷之顧之佑之命之又反復申重之  
畀以殊祥錫以純嘏仁風扇協氣游甘露降醴泉  
涌雨暘時若豐年穰穰景應響答未見侔比 皇  
帝建中和之極啓昇平之運盛德大業富有日新  
猶且堯兢兢舜業業夙夜宥密罔不祗肅敬之至  
也又臨朝泣政接下誠民惻怛勤懇咸本誠意夫  
敬禮之輿也誠聖人之本也宋呂祖謙謂惟敬故  
壽主靜則博厚悠久自強則堅固精明敬之方壽  
之本也中庸言至誠無息至配天地極於無疆漢

董仲舒亦言天瑞應誠而至理皆自然可信 皇  
帝誠敬作所篤祐純佑職此之由自今以往 天  
休滋至億載萬年永永無極雖復握六觚備五數  
迎日布策推諸無窮皆未足方此 遐福洪算矣  
臣持橐禁廷竊以歌詠 神聖功德爲職雖弁鄙  
弗獲自己謹効管蠡闕測敬呈 萬年寶曆詩十  
章章十二句其詞曰

皇帝至德包乾毓坤法宮之中安安存存罔我萬國如歲  
之春昭事 上帝祇戒明禋禎符乃來日歸於仁於萬斯  
年以撫兆人

皇帝大孝立愛親始率 祖攸行陟降庭止 兩宮寢膳  
必躬問視更歷歲年追慕不已天至之性逮於麟趾於萬  
斯年永錫繁祉

皇帝儉勤萬幾在宥土事不文木事不鏤法天地節爲爾  
民富未明求衣視百司奏大官尙食或稽晝漏於萬斯年  
功崇德懋

皇帝知人峻德克明咨岳詢牧俾佐太平下及百吏胥簡  
於廷追之琢之出玉之英薪之禎之得國之楨於萬斯年  
羣材蒸蒸

皇帝愛民廼煦廼育天地中間液洽滲漉賜萬萬租復出

懷清堂集 卷二 三  
廩粟不謁而獲與聚所欲仁增益高澤久逾渥於萬斯年  
惟帝之祝

皇帝好生上與 天通仁愛矜恕靡物不容一夫非辜爰  
厘 帝衷敬爾由獄無俾滋豐蒸爲甘雨散爲和風於萬  
斯年慶刑之中

皇帝功烈首導河渠美溢弗治民其爲魚淮泗湯湯旣播  
旣䟽億萬之口有那其居灌浸通利陂澤江湖於萬斯年  
豐我黍稌

皇帝性學該貫三極窮天之紀周地之脉合樂和聲造化  
彫臆乙夜披覽六經百籍煥乎文章垂億代則於萬斯年



焜煌 寶曆

皇帝神武電掣霆摧誅三叛人稟 帝指麾削平沙漠申  
命六師苞有遺孽萌芽於西其渠乃殲其庭乃犁於萬斯  
年殊方來威

皇帝景福濡被九有大哉乾元爲物之首環四瀛外獻見  
奔走百昌熙熙以蕃以阜民之捧戴 元后父母於萬斯  
年與天齊壽

白石橋

來往朝烟與夕霏寒衣脫盡賸春衣波清曲渚魚游樂草  
綠平疇雉乳肥屢浣衰顏塵冉冉尙牽芳思柳依依廿年

白石橋邊路華表難尋老令威

山行微雨旋止

村落多勤雨風雷肯破山沮洳泉更細焦灼石俱頑芳草  
一時歇行雲何處還霏微飄數點賸取客衣斑

望雨

瀟灑過長日平安得小輿巖巒欣應接雲雨惜空虛扶老  
因加飯全生且撥書此情同逆旅泱泱想鳴渠

距熱河三十里山頂有方石高二丈許矗立中斷爲  
二四旁有刻劃痕洵異觀也

有石能自立無人爲告勞鬼工曾密運仙掌得雙高俊拔

千夫特欽崙萬劫牢鍾靈定何自一舍卽神臯

圖南編修送餅餌

蘭若期三宿寓小菴中牢丸餉一椀出籠霜比潔入手月爭圓

方法傳中禁分張壓食單老夫貪軟美不用勸加餐

宿螺山

薄雲霑灑不成泥暝色山光望已迷東嶼人家最惆悵今

朝雨在白檀西

道中遣懷

仲夏實炎月行人尙披裘怪此氣候殊或云雲石稠山中  
洵多寒問昔有此不陰盛致水潦曠乾豈其由顧視畦隴

閒詎知麥當秋一雨得破塊投種冀晚收 至尊方焦勞  
羣公急良籌奔走禱祠廟香幣沈靈湫百請未一應冥默  
神應羞商羊會當舞旱魃行且休比聞秦晉饑赤地良可  
憂斗米貴於珠萬錢價不酬 詔發洛倉穀三門首汎舟  
吏頽內府金起此鵠與鳩比戶先流亡轉徙之他州他州  
不見容扶挈死道周符節繫誰持坐視民呻吟肉食古所  
鄙但知爲身謀王師令方西遠過青海頭壯士務殺敵暑  
月猶兜鍪熱風來如燒瘴氣日夜浮轉粟青天上牽挽踣  
萬牛矧久缺甘澤何以富來甦安得膚寸雲崇朝浹九邱

杜注九州也 滂沱未可望浩蕩生邊愁

重入南天門

傳烽不記蠶房谷乘障空聞司馬臺二十四關休護塞通天只用一門開

出城小睡

平肩輿更穩於舩合眼華胥到最先螿穴蟲巢等相殺不如蝴蝶去翩翩

三家店

麥隴焦枯農廢耕已荒春作待秋成雲霾東北將蒸雨風轉西南又放晴樹下暗泉喧晚汲道傍孤店餉塵羹邊州

糠粃無來處一飯真應判死生

秦晉皆苦饑聞肅州以西數十金易斛米亦不可得

潮河川

言喚白河船復問潮河渡出山各分流入海會同注

自牛欄山寺曉發

晚到羊車喚小乘早隨鳧舄歷千塍

是夕順義令亦  
禱雨宿寺中

飛塵

便旋多風候初日蒼涼豈雨徵四野幾時操耒出萬山何處望雲興神仙詎合分今古喫火翻瓢見未曾

南天門

丹梯盡處敞雲樓形勝關門最上頭一握天低隨鳥度兩邊山合夾川流琳宮燈月神光滿墨海蛟龍筆勢遒

上有  
御書

額此日憑高展清眺恍疑汗漫與同游

古北口

王公有設險此地洵雄哉山似中原盡關臨絕塞開五營  
軍令肅一疊角聲哀遺堞無憂掃時清罷戍臺

由長山峪北行三十里偶成

十年四度往來頻世事翻雲覆雨新  
梧老待棲孤鳳下芋收欲賦衆狙  
嗔久知朱紱應拋我每對青山覺  
泥人自是幼輿饒骨相非關中散  
出風塵

自石匣入山

昨夕雷雨過縱橫舒百卉朝來畦隴閒  
父老喜相慰東峰已曙色西嶺尚雲  
氣得晴景亦佳望雨情未旣良苗欣  
黍

懷清堂集 卷二十一  
九  
稷惡草壯蓬蔚萬物共生成耿耿知自貴人閒偏側路豈  
得長無謂我起催僕夫及此炎毒未清風方徐來夏日詎  
可畏前凌欽岑險後有豺狼涕且酌山澗流稍知谷飲味

偶讀少陵望嶽詩

朱崖碧海見秋毫月窟崑崙想像勞東望泰山西望華當  
時何惜一登高

翁有遠行述懷柬陸柱彈五首之二末首謂馮生文

子

豈願家作浪游不堪歲月付東流可憐太傅空雙目但  
見郎中有四愁知已異鄉誰倒屣故人此地幾尋舟歸來



倘亦憐同調反哺情殷借一籌

其五

何論畫篋與詩筒盡付咸陽烈焰中若個憐才芳草綠阿  
誰刺眼杏花紅寂寥庭院三更雨辜負欄杆五尺風倘見  
馮生爲一語好憑清夢各西東

和喬石林侍讀生辰韻

旋和新火又花辰荏苒東風二月春初度恰逢桃菜節玉  
堂閑有詠詩人浮沈當世羞諧俗密爾斯文可答賓絲竹  
不鳴門館寂未妨官况號清貧

篇章倡和我何能輞口虛傳王右丞酒劑心情看社到詩

家格律與年增江亭柳色連朝雨淮市秋風落晚昏莫怪  
鄉園幽興熟此中真味辨淄澠

王師入藏凱歌十二首

有序

臣聞布昭聖武斯王者之有征肅將天威惟仁人

爲無敵若夫戶未登於版籍地不隸於職方自非  
廟略之遐宣詎易膚功之克奏欽惟我 皇上綏

懷萬邦照臨八表 體春生秋肅之義丕著聲靈

備文經武緯之模閒行討伐彼澤旺阿拉布坦

者罪人遺孽小醜稽誅當噶爾丹甫經削平之時

維諸大臣卽以剪除爲請我 皇上天地含弘之

德雨露長養之仁予以生全俾之孳息乃梟獍之  
性飽卽辜恩虺蠆之心生而肆毒先之哈密俶擾  
繼則西藏虔劉敢殘掠之恣行實神人所共憤六  
師其整九伐將申而廷議不無異同謂絕域實當  
險遠但丸泥以封函谷何事長征第尺檄以閉玉  
門恐難深入 皇上憫無辜之蒼赤既胥虐以胥  
戕決必勝之機宜由知己而知彼寬渠元惡法在  
不原除暴安民事非得已且沿邊各部護塞諸番  
儻踰歲時寢被煽誘苟非及今殄滅何以永靖邊  
陲於是 運獨斷之明 炳先幾之哲 親授諸

將之方略咸奉成算以指麾復 命賢王總司戎  
律桓桓之士如虎而如貔矯矯之臣一心而一德  
九秋氣霽瞻太白之方高五緯芒寒指櫓槍之競  
落金鉦直進鐵馬長驅奮迅雷霆馳驟風雨分三  
道以襲擊左右不支督諸軍以攻圍飛走無所遂  
冰摧而霧廓爭解甲以投戈受降旣多獲級無算  
器仗山積馬牛谷量而西路統制之兵建大將旗  
鼓而出軍分兩翼預防伏莽之姦計定七擒誓絕  
傳烽之警月壘環而頭懸面縛雲羅合而鳥散魚  
驚奏三捷於軍中布大喜於天下靈旗所指聲騰

慈嶺之西武節遙臨威憺濛池而外迺拉里折衝  
之將兼滇蜀犄角之師策遂決於搗虛時方掩其  
不備啣枚夜渡卷甲晨趨不頓一兵已收全藏準  
噶兒之狠貪豕突國典宜申唐古特之慕義歸仁  
民勞可念前旌甫入法炬重新貝葉千花沐 王

師之時雨蓮臺九品頌中國之 聖人此蓋曠代  
之所弗寶前人之所未至皆由我 皇上排羣議  
斷 宸衷定破竹之勢於禁中收聚米之形於掌  
上故能戰無不克謀必有成等六合於庭衢視萬  
里猶咫尺晷刻靡爽若寒暑之應期變化無方誠

鬼神所莫測城隣碎葉必殪都支路出崑陵還禽  
賀魯車書混合一澄瀚海之波氛稜肅清重勒高  
昌之石臣職司侍從代際賡歌聞大捷之軍書祇  
深忭蹈獻無疆之壽筭幸在闕庭謹倣古者饒  
吹遺意爲凱歌十二章恭呈聖覽雖慚下里無

文聊志普天同慶云爾

臣右會

曷勝瞻仰惶悚之

至謹稽首頓首恭進

恭行天罰遠徂征絕域雲霓望救情

聖主萬方同一體

用兵正是要銷兵

列缺騰光耀太微

睿謨玉帳授兵機禡牙勃律天西路

鷲鳥轅門不敢飛

雲臺列仗儼星羅  
洗甲條支海上波  
決勝九天分玉斧  
受期諸將縱金戈

賢王秉鉞建殊勲  
喜氣朝來壓陣雲  
幕府共傳都統制  
凱歌爭唱上將軍

疑從枕席過 王師夜半長河飛  
渡時九地忽聞鳴鼓角  
不遺一矢定烏斯

來迎簞食與壺漿  
歌唄聲中出寶坊  
稽首中原無量佛  
千花藏裏萬爐香

殊方膜拜慶 王春爭看東來日出人  
弱水長流三萬里

懷濟堂集  
卷二十一  
也應貫斗上天津

羽林精銳領材官  
烏壘城邊上將壇  
未用尺書招贊普  
直須長劍斬樓蘭

毗沙熱海路連延  
莫道陽關已近天  
新置宜禾都尉府  
北胥鞬外盡屯田

西遐草木震霆雷  
萬古何人到此來  
自是九重親決策  
天關闢處地垠開

遙從葱雪望河源  
苜蓿葡萄近塞垣  
伐石天山紀功德  
崑崙便是國西門

龍蛇繞出陣堂堂  
掃穴犁庭撻伐張  
從此共球集王會



太平天子萬年觴

閏五月十日大雨後作

小睡西堂喚不應清風急雨掃炎蒸  
暫休格鬪階前蟻且免驅除案上蠅  
燕子暄涼時漸改雞人昏晝候難憑  
只餘病骨衰羸外優穩閑官亦自矜

題陳斐公清江盪漿圖

想見烟波白鳥雙披圖便似到家江  
參差紅樹青山外一葉漁舸七里隴

隱居學道此何人清淨登仙位業親  
只傍水精宮畔住不曾一點漣紅塵

勝味屠門了不知綠葵紫蓼足山資盎然與物同生意嬾  
向江邊理釣絲

蘆花淺水纜頻牽小小容渠兩板船占得四時風景好一  
錢不用買江天

翠袖文袿衆樂停看君水戲出迴汀鱗鷓躍後鮪鯉引雲  
霧青天晝杳冥

菰蒲聲裏小舟通宿火魚梁蠓舍東江上秋來聽夜雨雅  
宜艖背庖安蓬

放櫂空明縱所如休論陸處與舟居往來西塞山前路千  
點桃花五色魚

鼉作鯨吞倏改觀中流呼嘯舞濤瀾用人莫要勤看客此  
老胸中溟漲寬

次韻雪子月下見懷之作

蟋蟀聲裏故山違蕩蕩空中明月輝入夜清光看更迥似  
君好客到應稀黃金印大從教取白玉卮溫肯浪揮臺閣  
鵝鸞滿天路病餘老鶴尙孤飛

風露蓬山永夕居水天涼影靜禽魚料量藥物衰逾甚商  
較人材壯不如積雨歇時移月畢霽河斜處映星虛每思  
伴直呼君去吹火青藜夜校書

林木幽森列稍攢吟情遙上玉盤盤弄雛新比元和柳畫

馬肥嗤弟子韓未識孟鐙聊止酒苦耽書卷豈堪官清商  
一部酬風月莫聽哀絲慘不歡

自贊門無知已求明珠忽枉暗中投郊居製賦要元禮雪  
夜迴船念子猷橘課千頭須檢校茶香八餅會勾留晚來

事少關心處身世飄然已共浮

詩成於中秋前筆爛未及書小雪雪子將南行匆匆

來告別予方病困潦草錄出益復顛掣不成點畫矣辛丑十月朔此琉球紙也亮直編修使歸餉予百番因試之較高麗似勝

### 得家兄孫敏書

自嗟家世本無年九十兄今在眼前料檢蠶漁猶俗累掃  
除荆棘或仙緣饑寒幸未同榮啓官職虛教望阿連何日

村南共烟舍此生容易說

田

南船寄至盆桂二叢招蔗山太僕南屏侍御南指舜  
揚翰編西亭繕部峙公文學雪子孝廉小飲有作  
兩叢容易入書堂風露初寒合蔽藏花葉紛敷來海曲根  
株攘剔自吳鄉分張與作中秋景擁護多畱數日香傾倒  
更呼嘉客共撥醅下箸酒新嘗

丙寅秋予客游江陰時主人則有邑令陸雲士賓客  
則有曹武歌鄰湘兄弟酒場歌地登臨游讌之樂  
無日無之席閒歌者時郎藝冠流輩每一發聲座  
客嗟歎不覺其耳之傾倒也明年丁卯春予北游

復取道江上仍爲屢屐之會時亦在焉曲終酒罷  
月落潮平作五絕句贈時解纜而去自此絕不相  
聞今年夏六月臥痾杜門時忽來京師以原詩裱  
池卷軸俾獲重觀則忽忽三十五六年事矣偶然  
落筆了不省憶予旣老病萬念零落時亦紅顏皓  
齒非復疇昔雲士隣湘又久經下世追念舊游恍  
如夢寐感歎不已又作一篇云時辛丑中秋後十

日

纏頭屢費曹顏遠顧曲頻煩陸淩儀地下久經理玉樹尊  
前何處認瓊枝樓臺鶯蝶春暄早歌舞江山月墮遲白髮

蕭卽憔悴甚夢游仙是少年時

病中卽事時辛丑十二月六日

負暄南牖小匡牀升斗呼兒糴太倉京尹豈能令粟賤

唐李

峴事今年都下米貴石至銀

四兩五十年來所未有也江南未可謂錢荒

司馬溫公議社倉法

云江淮之南民間之錢謂之錢荒今五城御史糴倉米必責錢錢價驟貴銀一兩止得錢八百

無絃陶令

琴三弄食粥顏公帖數行歲尾都人尤望雪狹鄉情更急

寬鄉